

27. oktober 2020

UKA 2020/118/180

Utoqqalinersiaqarneq pillugu Inatsisartut inatsisaannik nr. 20, 23. november 2015-meersumik UPA 2021-imut allannngorteqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni pisortanit utoqqalinersianik pisartagaqarsinnaaneq 66-inik ukioqalernermit pisussanngorlugu allannngortinneqarluni.
(Partii Naleqqap Inatsisartunut ilaasortaaitai)

Kalaallit Nunaanni utoqqalinermit pensionisiat tunngaviusumik aningaasartaata Qallunaat Nunaanni utoqqalinermit pensionisiat tunngaviusumik aningaasartaannut Qallunaat Nunaannilu soraarnerusutisiamik aaqqissuussinerup nalimmassarnissaannut Naalakkersuisut UKA 2021-mi siunnersuummik saqqummiusseqqullugit peqquneqarnissaat pillugu Inatsisartut aalajangiiffigisassaattut siunnersuut.
(Inatsisartunut ilaasortaap Peter Olsen, Inuit Ataqtigiit)

Inatsisartut aalajangiiffigisassaattut siunnersuutit marluk, tassalu utoqqalinersiaqarnermut tunngassutillit marluusut Partii Naleqqap Inatsisartunut ilaasortaaitaasa aammalu Peter Olsenip Inuit Ataqtigiinneersup siunnersuutaa ataatsikkut oqallisigineqartussaasut imaattumik Siumumiit oqaaseqarfigissavarput.

Nunatsinni utoqqanngorluni inooqataaneq nuannersuusariaqarpoq, toqqissisimanartuulluni aammalu sapinngisamik pitsaasuusariaqarluni.

Salluneruallaasagunangilaq oqaraanni utoqqaat pillugit politikikkut suliniuteqartuarneq ukiorpassuanngortuni ingerlasimavoq ingerlajuassagunarlunilu.

Utoqqalinersiuteqartarnerup aaqqissuuteqqinneqarnera ukialunnguit matuma siorna pereeraluartoq suli inatsimmik nalimmassaaneq pisariaqartoq pisariaqartuassasorlu Siumumi isumaqarpugut.

Ukiualuit matuma siorna aaqqissuuseqqinneq eqqarsaatigalugu Siumumi utoqqalinersiaqalersinnaanermut ukiussarititaasut utoqqalinersinialernermit ukiunit eqaatsumik ikaarsaarfeqartarnissaq qitiutissimavarput, tassani utoqqaat suli sulisinnaassuseqarluartut sulerusussuseqartullu inuiaqatigiinni kiffartuusseqqataanissaat kiffartuusseqqataarusunnerallu iluatinnaateqaqisoq timitalerumallugu. Taamaammallu utoqqalinersiuteqartut saniatigut sulisarnerminnit annertunerusumik pissarsisarnissaat aamma ilaatigut aqqutissiuunnikuugipput.

Siunnersuuteqartut, tassalu Partii Naleqqap inatsisartunut ilaasortaaitaasa tunngavilersuutaat, tassalu utoqqaat nunatsinni inuuniarnikkut Danmarkimi najugaqartunut sanilliullugit ulluinnarni inuuniarnikkut atugaat annertuutigit nungullarnarnerungaarsinnaasut Siumumi assortunngilarput, aammalumi isuma taanna Siumumi annertuumik utoqqalinersiutit pineqartillugit isummersornerni qaqillattaasarsimallutigu.

Paasissutissat takutippaat inuuneqqortussuseq nunatsinni suli appasinnerungaatsiartoq Danmarkiminngarnit. Taamaammallu utoqqalinersiaqalersinnaanermut ukiorititat nalilersorluaqqinneqarnissaat Siumumi isumagigatsigu unneqqarilluta matumuuna oqaatigissavarput, sulisinnaassutsip annertusiartornera pigaluartoq ataqqinartumik utoqqalilluni inuiaqatigiinni inooqataanissaq pingaaruteqarluinnarmat.

Taamaammat utoqqalinersiaqalersinnaanermut ukiorititat 66-iniitiinnarneqarnissaannut Siumumi nalilersueqataarusuppugut iliuuseqqaqataarusullutalu.

Tunngaviusumik utoqqalinersiat aningaasartaasa Qallunaat Nunaanni soraarnerussutisiamik aaqqissuussinerup nalimmassarnissaanut Naalakkersuisut UKA 2010-imi siunnersuusiussasut Inatsisartunut ilaasortap Peter Olsenip Inuit Ataqtigiiinneersup siunnersuutaa Siumumi aammattaaq soqutigintikkatsigu matumani oqaatigissavarput.

Tunngaviusumik utoqqalinersiutinik pissarsinnaatitaaneq utoqqartatsinnut aaqqissuussaq pitsaasuusooq Siumumi isumqarpugut, naak aningaasartaasa annertussusaat immaqa suli qaffasinnerusinnaanerat isumaliutigineqarsinnaagaluartoq.

Nunatsinnimi inuuniarnikkut atugassarititaasut Danmarkimi inuuniarnikkut atugassarititaasunut sanilliullugit amerlasuutigut akisunerusinnaasaqisoq ilisimavarput. Inigisamut, ikummatissamut, angalanissamut ilami aamma inuussutissanut akit qaffasinnerungaatsiarsinnaasarput nunatsinni, tamassumalu ilaatigut nassatarisarpaa innuttaasut utoqqalilernerminni nunarput qimallugu nuuttarnerannik. Tamanna soorunami uggornarpoq aaqqiivigisariaqarlunilu.

Siunnersuuteqartup Naalakkersuisut aappaagu ukiakkut siunnersuummik saqqummiussaqaarnissaat anguniarpaa, taamaalilluni qaffasinnerusumik tunngaviusumik utoqqalinersiuteqarsinnaaneq qanoq anguneqarsinnaanersoq takussutissiarineqassammat. Siumumi pingaartutut isumaqarfigaarput tunngaviusumik utoqqalinersiat pineqartillugit kalluagassat utoqqalinersialinnut kingunerlussinnaasut pinngitsoortinnissaat.

Siumumi nuannaarutigalugu maluginiarparput Naalakkersuisut akissuteqaamminni oqarmata Naalakkersuisut utoqqalinersianut tunngatillugu oqaloqatigiinnissamut ammallutik, tamaammat siunnersuutit ukua marluk pitsaasumik kinguneqartumik ingerlariaqqinnissaat Siumumi isumaqarfigaarput.

Taamatut Siumumiit oqaaseqarluta siunnersuutit ukua Ataatsimiititaliamut susassaqtumut ingerlatinneqarnissaat inassutigaarput.

Anders Olsen, Siumut.